

Na osnovu čl. 4., 9. i 25. Zakona o Agenciji za bankarstvo Federacije Bosne i Hercegovine („Službene novine Federacije BiH“, br. 9/96, 27/98, 20/00, 45/00, 58/02, 13/03, 19/03, 47/06, 59/06, 48/08, 34/12 i 77/12), čl. 47., 48. i 50. Zakona o deviznom poslovanju („Službene novine Federacije BiH“, broj 47/10), a u vezi sa članom 38. stav 1. i članom 51. stav 2. i 3. Zakona o bankama („Službene novine Federacije BiH“, br. 39/98, 32/00, 48/01, 27/02, 41/02, 58/02, 13/03, 19/03 i 28/03), a u vezi sa Odlukom o minimalnim standardima za obavljanje mjenjačkih poslova („Službene novine Federacije BiH“, broj: XX), Upravni odbor Agencije za bankarstvo Federacije Bosne i Hercegovine, na 1. vanrednoj sjednici održanoj dana 19.11.2013. godine, donosi

## ODLUKU O POSTUPKU KONTROLE OBAVLJANJA MJENJAČKIH POSLOVA

### Član 1.

- (1) Odlukom o postupku kontrole obavljanja mjenjačkih poslova (u daljem tekstu: Odluka) propisuje se postupak kontrole obavljanja mjenjačkih poslova koju Agencija za bankarstvo Federacije Bosne i Hercegovine (u daljem tekstu: Agencija) vrši kod banaka i ovlaštenih mjenjača.
- (2) Kontrolom iz stava 1. ovog člana utvrđuje se da li se mjenjački poslovi obavljaju u skladu sa Zakonom o deviznom poslovanju (u daljem tekstu: Zakon), propisima donesenim na osnovu Zakona, zaključenim ugovorom o obavljanju mjenjačkih poslova (u daljem tekstu: Ugovor) i Odlukom o minimalnim standardima za obavljanje mjenjačkih poslova.

### Član 2.

Pojmovi: mjenjač (banka, filijala banke sa sjedištem izvan Federacije Bosne i Hercegovine i ovlašteni mjenjač), devizno tržište, mjenjački poslovi, rezidenti pravna lica i poduzetnici, ovlaštenje, mjenjačko mjesto i blagajničko mjesto u smislu ove Odluke, imaju značenje utvrđeno Zakonom i Odlukom Vlade Federacije Bosne i Hercegovine o uslovima i načinu obavljanja mjenjačkih poslova (u daljem tekstu: Odluka Vlade).

### Član 3.

Kontrola obavljanja mjenjačkih poslova vrši se:

- a) posredno – kontrolom podataka, izvještaja i druge dokumentacije koje su mjenjači dužni da dostavljaju Agenciji, odnosno kojima Agencija raspolaže;
- b) neposredno – kontrolom obavljanja mjenjačkih poslova kod ovlaštenog mjenjača i na mjenjačkom mjestu uvidom u poslovne knjige i drugu dokumentaciju.

#### Član 4.

Kontrolu obavljanja mjenjačkih poslova kod mjenjača obavljaju ovlašteni zaposlenici Agencije na osnovu naloga za kontrolu. Ovlašteni zaposlenici posjeduju i službenu legitimaciju koju prezentiraju zaposlenim u mjenjačima.

#### Član 5.

Zaposlenik u mjenjaču dužan je da u postupku kontrole ovlaštenim zaposlenicima omogući uvid u mjenjačko poslovanje, da osigura tražene podatke i dostavi potrebnu dokumentaciju, a u suprotnom Agencija će prekinuti kontrolu i pokrenuti postupak pred nadležnim organom.

#### Član 6.

- (1) Zapisnik o izvršenoj kontroli obavljanja mjenjačkih poslova (u daljem tekstu: Zapisnik), dostavlja se mjenjaču najkasnije u roku od 7 (sedam) dana od dana okončanja kontrole. Direktor Agencije može rješenjem odrediti i drugi rok za dostavljanje Zapisnika mjenjaču. Jedan primjerak Zapisnika dostavlja se mjenjaču.
- (2) Mjenjač ima pravo prigovora na Zapisnik u roku od 5 (pet) dana od dana prijema istog.
- (3) Nakon isteka roka za prigovor ili nakon razmatranja prigovora, Agencija donosi rješenje o izdavanju pismenog naloga mjenjaču za otklanjanje utvrđenih nepravilnosti i slabosti navedenih u zapisniku, te određuje rokove za njihovo izvršenje.
- (4) Protiv rješenja iz stava 3. ovog člana mjenjač ima pravo prigovora direktoru Agencije u roku od osam dana od dana prijema istog.
- (5) Ako u roku iz stava 3. ovog člana mjenjač ne otkloni utvrđenu nepravilnost, Agencija će poduzeti mjere predviđene zakonom i/ili dati prijedlog Federalnom ministarstvu finansija/Federalnom ministarstvu financija za pokretanje postupka oduzimanja ovlaštenja za obavljanje mjenjačkih poslova.
- (6) Mjenjač je dužan da o izvršenju naloga iz rješenja pismeno obavijesti Agenciju i to najkasnije narednog dana od dana isteka roka datog u rješenju.
- (7) Agencija provjerava izvršenje naloga iz rješenja i o tome sastavlja Zapisnik o izvršenju naloga.

#### Član 7.

Mjenjači su dužni izvještavati Agenciju o obavljanju mjenjačkih poslova na način i u rokovima koje propiše Agencija.

Član 8.

Uputstvima za provođenje Odluke i Procedurama za kontrolu obavljanja mjenjačkih poslova bliže se propisuju uslovi, način izvršenja i primjene ove Odluke.

Član 9.

Ova Odluka stupa na snagu narednog dana od dana objavljivanja u „Službenim novinama Federacije BiH“.

Broj: U.O.-01V-6/13

Sarajevo, 19.11.2013. godine

ZAMJENICA PREDSJEDNIKA

UPRAVNOG ODBORA

Mr. sc. Ljerka Marić dip.ecc.